



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Aibelen tesü, ibai rara ka asütsü: Barrack Obama

Foden nem PFA player of year naroküm agütsüogo



VOL. XXI ISSUE NO. 309 (ADOK 309) DIMAPUR YANGTEPNÜ (THURSDAY) LUROI (AUGUST) 22, 2024 ₹ 5.00

NSF-i NEET ajanga shimba candidates jangjatsü

Dimapur, August 21, 2024 (TYO): NEET ajanga course balala agütsü shimteta alirtem indang kulikatket jangjashitsü atema Naga Students' Federation (NSF)-i osang metetdaksüogo.

August 22 nungi August 23, 2024 tashi NSF Education Committee ajanga kaketshirtem indang kulikaket physical verification asütsü ta NSF-i sangdong ka nung ashi.

Iba mapang candidate temi pei tsürabur mesüra guardian anir arutsüla aser passport-sized photograph, NEET Documents, HLSC & HSSLC Admit Cards, Scheduled Tribe certificate aser Indigenous Certificate bener arutsüla ta NSF-i ashi.

Nagaland state quota kübok

lemzükba menden nung Nagaland state nung azü agi Naga nunger dang shimtsü. Tesüiba nung state quota kübok non-indigenous candidates-i tenüng agütsüba metetogo aser iba ya magizüker ta NSF President Medovi Rhi aser Secretary Education Temjentoshi nati sangdong nung ashi.

Agüja aliba anogotem nung verification maparen nung shilem magiba candidate tem meshimdaksütsü aser parnok dak tapet mapa inyaksü ta NSF-isa metetdaksüogo.

Iba dak sendakba osang metetpelatsü asoshi 8974523931/8731911712 ajanga tongteprateptsü akok ta parnokisa ashi.

NMSA-i sorkar dang departmental examination magütsü mepishir

Dimapur, August 21, 2024 (TYO): Nagaland Health department-i COVID-19 wara mapang 'contractual basis' nung shimokba doctor tem regularization asütsü atema departmental examination agütsü sangdong agütsüba atema mepelar ta Nagaland Medical Students' Association (NMSA)-i metetdaksüogo.

Iba inyakyim ya service rules alema lir aser Class 1 Gazetted Officers shimba inyakyim nung ashishitep adokdaksür. Extra Assistant Commissioners aser Sub-Divisional Officers den kasa jenjang mapatem ya Nagaland Public Service Commission

(NPSC) Combined Technical Services Examination (CTSE)' kübok adentsüla ta NMSA-i ashi.

"Nagaland health department-i departmental examination agütsü sangdong ya tim masü aser public service recruitment tamendakdak den meputep. Talisa medical graduates-i kanga dang meranga tatidang atema renemba nung timtem ajurutsü" ta parnokisa ashi.

"2010 aser 2021 tsüngda NPSC-i Medical Officer posts 87 atema dang tatidangtem agi aser parnokji regularize süogo. Tang departmental examination ka ajanga mapa 98 regularize asütsü lemtetbaji tesüiba nung inyaka

aruba den khenyongi meputep lir. Nagaland nung medical graduates teimba akümer aser talisa Nagaland nung mezüngbuba medical college lapokba sülen tazünger teimba kümogo" ta NMSA-isa ashi.

"State sorkari August 26 nü agütsü aliba departmental examination sota ayutsüla aser tanga state tem nung ama NPSC Combined Technical Services Examination (CTSE) ajanga nisungtem shimoktsü mepishir. Nagaland nung kaketshir telok, civil society organizations, lokti lennirtem aser public-i sorkar lemtet magizüktsü mepishir" ta NMSA-isa metetdaksüogo.

Dimapur nung kaketshirtem Aadhaar update asütsü

Dimapur, August 21, 2024 (TYO): ADC Dimapur Zakabo V. Rotokha menden ser August 21, 2024 nü kaketshirtem asoshi Aadhaar Mandatory Biometric update atema senden ka menogo.

September ita tetenzüklen school tem nung Aadhar camps lapoktsü aser iba mapang arishi küm 5-7 aser 15 nungi 17 tsüngda kaketshirtem Mandatory Biometric Update asütsü atema tanü senden nung telemtetba agi.

"Aadhaar Biometric update maparen nung school ketdangsür ajaki amalitepa yariteptsü mepishir kechiyong Aadhaar aliba kaketshirtemi de-

activation aser authentication failures ajurutsü akok" ta ADC Rotokha-i ashi.

Senden nungsa school ana asem lokteper iba mapa inyaksü atema tebilembatem lemsatapa liasü.

Senden nung DEO, DPRO, All Nagaland Private School Association Dimapur Unit, Nagaland School Alliance aser Dimapur district administration ketdangsürtem aden.

Unique Identification Authority of India-i DC aser DEO ajak dang pei pei telongtet nung Aadhaar atema Mandatory Biometric Update asütsü tetuyuba agüja lir.

PDA sorkari teinyaktsü tim meinyakba jungkai adoker: RPP

Dimapur, August 21, 2024 (TYO): Tzüngluruwa aruba ajanga Nagaland nung PDA sorkari mapa shitak meinyakba jungkai adoka sayur ta Rising People's Party (RPP)-i ashi.

Dimapur nung lenmangtem nung tesenzü majung kümogo aser drainage system shitak maliba ajanga tüzümsüng timtem ajurua lir aser iba ajanga dengue tashidak adoktsü ta RPP-i ashi.

PDA sorkari Nagaland nung lenmang aser tanga infrastructures asoshi temulung magütsür saka parnokji Chiethu airport aser Nagaki city lapoktsü atema dang jangrar.

Tesüiba nungbo urban area nung gari lenmang ya state PWD kübok liasü saka PDA sorkari küm ishika tejaklen ola madoki dang Urban Development

Department (UDD) kübok dendaktsüogo. Tanü Urban Development Departmen-i Nagaki City atema dang tebilemtsü abener kechiyong iba dak sen crore noklang aika sendaka lir, ta RPP-i ashi.

PDA sorkari ano mapatong ka asoshi kanga temulung agütsübaji Chiethu airport project lir aser iba mapatong ya agizükra sen crore meyrjang aika angutsü. Ministry of Civil Aviation-i iba tesem nung airport meyanglutettsü ta shiaka PDA sorkari ibaji magizüker, ta RPP-isa ashi.

Külen, Nagaland nung airport aser railway station Dimapur nung dang kaka lir saka item ali atsünga agimadar. Anungji August 27 nü NLA session amendang airport aser railway station asoshi White

Paper ka benoktsü ayongzükler ta RPP-isa metetdaksüogo.

"Chiethu project inyaknürtemi aliba tesem alizükba nung sen crore aika endokogo ta osang angazükler. Kasa inyakyimji Nagaki City atema inyakdar. Nagaland nung ozüng alema inyaksangshir tulutibaji yimten yimsüsür kar lir aser parnokji Nagaland indang rongsen ajunga azüoka lir" ta RPP-isa ashi.

Opposition maliba sorkar nung yimsüsür parnok ishika jagi sen crore aika amshir aser tanünga MLA tem senotsü terara anguba agi pelaseter alir. Külen, yimsüsür parnok ishika jagi Naga yimten latettsü nung yariteptsü atema Political Affairs Committee (PAC) ka tentettsü ashiba MLA ajaki mulunga agizükler

CISF-i RG Kar hospital repringshimer

Kolkata, August 21, 2024 (Agencies): Supreme Court-i yashi tetuyuba agütsüba sülen Central Industrial Security Force (CISF) telok ka Kolkata nung RG Kar Medical College and Hospital tonga aruogo.

Mongulbarnü Supreme Court-i ken o angadandang August 14-15 aonung nisung telok kati RG Kar Medical College and Hospital nungpoka tua ozüng alema inyakba atema West Bengal sorkar aitsüogo.

Iba tatalokba atema assistant police commissioner (ACP) ana aser inspector ka mapa nungi anentsüogo ta ketdangsür kati ashi.

CISF ketdangsür telok ka Bodbarnü mozüki tonga aru aser parnokji security maparen repringshimtsü. Parnokisa health department aser Kolkata police den senden balala menogo.

RG Kar dena state sorkari lapokba mozü ki tulu ajak nung private agencies-i contract

inyakyim nung security personnel agütsür. Item amala mozü kitem nung main entrances aser emergency departments kima nung dang police-i anüker.

Chief Justice of India D Y Chandrachud-i aniba bench kati Mongulbarnü August 15 nü atalokba atema state sorkari aitsü.

"Trainee doctor ka dak tashiyim agi shi nung medemba aser tepsetba lendong tulu atalokba sülen state sorkari security akangshir alitsü imlar. Ano iba dak sendakba bushisüngdang tesüdak nung nisung telok jagi mozü ki nungpoka tua ozüng alema mapa inyak. Anungji state sorkar kodaser renema maliasü onoki mangateter" ta SC bench-i ashi.

August 15 ayaterm nung nisung 7,000 shi kati RG Kar hospital telungi ai aser emergency building nung osettsüset raksatsü. Iba mapang junior doctor temi lungkak aita liasü.

NFSA kübok Nagaland nütsüng yongsük 70.95% adentsü



Dimapur, August 21, 2024 (TYO): Nagaland nung National Food Security Act (NFSA), 2013 kübok nütsüng yongsük 70.95% nem jangotsü angati agütsütsü atema state sorkari jangjaogo.

2011 census nung ajemdaker tanünga nütsüng yongsük 29.05% NFSA kübok madener ta Nagaland sorkari Bodbarnü metetdaksü.

Nagaland nung kilen 2,37,434 nungi nisung 11,93,922 tashi priority household (PHH) scheme kübok aser kilen 47,500 nungi nisung 2,09,657 tashi Antyodaya Anna Yojana (AAY) kübok

züngsemstsü ta sorkari ashi.

Food and Civil Supplies department-i non-NFSA beneficiaries teimba akümtsü atema mapa inyakogo ta parnokisa ashi.

Nagaland nung fair price shops 1852 lir aser FPS ji urban areas nung 459 aser rural areas nung 1,342 lir. NFSA kübok jangotsü angati December 2028 tashi PHH aser AAY ration card holders nem agütsütsü ta India sorkari tetuyuba agüja lir ta state sorkari ashi.

Tesüiba küm asem tashi jangotsü talila angur aser ibaji

sorkari district shia nung shimteta stockiest-cum-handling agent ajanga public nem government-approved rate ajanga ayoker.

Küm nung Rs 2.5 lakh aser tema angurtem aser AAY o PHH scheme kübok madenertem nem general household (GHH) ration cards agütsür aser parnok tide-over rice lemzükba nung adentsü. GHH beneficiaries indang maparen nung tashishitsü melii inyaksü atema department website nung parnok data ayutsü, ta Nagaland sorkarisa metetdaksüogo.

Dimapur nung BJP Nagaland workshop ka agi



Bharatiya Janata Party (BJ) Nagaland ajanga Lion's Club Dimapur nung Sadasyata Abhiyan membership drive sentong nung tangokba noksa angur.

Dimapur, Luroi/August 21 (TYO): Bodhbarnü Bharatiya Janata Party (BJ) Nagaland ajanga Lion's Club Dimapur nung Sadasyata Abhiyan membership drive indang anogo ka state workshop agia liasü.

BJP National Secretary Kamakhya Prasad Tasa-i Nagaland nung party kanga renloka ogo aser tanü state nung ruling government nung BJP shilem lir ta ashi.

Nagaland nung party züngsem 45,000 aliba nungi

2019 tashinung lakh ana kumogo, ta Assam nungi Lok Sabha nung MP, Kamakhya-i ashi. Nagaland state tilaka dang süaka iba membership drive campaign tezükba sülen nisung aikati adentsü amanger, ta ashi.

Iba sentong nung BLP leader aser Deputy Chief Minister Y Patton-ia membership drive ya züngdangba atema dang masü saka nübur ajunga den sendaktepa parnok nüngdakba angateta aser parnok takum

nung BJP kechi inyaktettsü, itemji sayutsüba atema lir, ta ashi.

Asenoki züngdangba kisung masü saka teyakyak, osangtsüsang meteta aliba aser grassroots nungi temalen tashi asen party tashi itdaksüba nisung aginer, ta pai ashi.

Iba sentong nung Rajya Sabha MP aser BJP State vice president Phangnon Konyak, Minister, PHED & Cooperation, Jacob Zhimomi nungeria jembia liasü.

Tesayuba tasa balala indang asemnü workshop tenzükogo

Dimapur, Luroi/August 21 (TYO): Department of School Education (DoSE) Nagaland, ChangeInkk Foundation, aser Durham University, UK lungjemer tesayuba tasa balala indang anogo asem workshop ka Morung Conference Hall, Directorate of School Education, Kohima nung August 21, 2024 nü tenzükogo.

Iba workshop ya International expert Facilitator, Dr. Johny Daniel, Assistant Professor, School of Education, Durham University, UK

lenisüba kübok agir aser inclusive classrooms adokdaksütsü, talisa oshioben angazükba nung timtemer aser Specific Learning Disabilities (SLD) atema tesayur temi skills nüngdakba agütsütsü atema iba workshop ya ayongzük.

Thavaseelan K, IAS, Principal Director, Department of School Education, Nagaland ajanga iba workshop ayongzükba nükjidong indang rateta ashi, kong Samagra Shiksha, Nagaland nungi

ketdangsurtem, Department of Employment, Skill Development & Entrepreneurship, GoN nungi ketdangsurtem aser SCERT-ECCE Cell Team dena liasü.

Sayantani Gaddam, Senior Fellow, Policy Program and Governance, ChangeInkk Foundation ajanga pela agizükba o jembi aser Mughato Swu onir liasü.

Iba workshop nung Kohima nung aliba government aser private school tem nungi teshimtet tesayur 50-i shilem agitar.

C-Edge College-i Financial Literacy awareness sentong ayongzük



C-Edge College indang Research Committee ajanga August 20, 2024 nü Awareness Programme on Financial Literacy ayongzükba nung adeneritem noksa nung angur.

Dimapur, Luroi/August 21 (TYO): Homemakers nem senotsü amshiyim indang tali tajungba nung angatetdaksütsü nükjidong nung C-Edge College indang Research Committee ajanga August 20, 2024 nü Awareness Programme on Financial Literacy ayongzükba liasü.

Iba sentong ya Research and Information System for Developing Countries (RIS) aser North Eastern Training Research and Advocacy (NETRA) Foundation ajanga sponsor asü, kong shisalen sayur ya T. Lhingneikim, Manager Financial Inclusion SBI Regional Business Office Dimapur, Nagaland aser Shiva

Prasad Dey, Asst. Prof, Mgt. Studies, C-Edge College liasü.

Iba sentong nung session ana liasü aser session ka nung Lhingneikim-i "Financial Literacy for Homemakers" onük nung ajemdaker jembi.

Lai jembidang senotsü tsütsü nükjidong ayutsü kanga tongtipang ta ashi aser sorkari sponsor asüba scheme balala nung rangloksü ayongzükba liasü.

Session tanabuba nung Shiva Prasad Dey-i "Investment Avenues" indang onük nung ajemdaker jembi.

Pai iba mapang investors atema sapang balala aliba indang lemsatep aser investment tilaka nungi tuluka

kuma aintsü atema yimya tem sayua liasü.

Iba swentong nung Naga United nung homemakers aser SHG balala nungi nisung 18 dena liasü.

Iba sentong ya Convenor ama Dr. Moameren Pongen, Asst. Prof, St. Joseph University, Chümoukedima, Nagaland aser coordinators ama Yimwapangla, Asst. Prof, CEC, aser Shiva Prasad Dey, Asst. Prof, CEC nungertem lenisüba kübok takok ngua agia liasü.

Sentong ajunga ya Yajennaro, Asst. Prof. of Sociology, CEC lenisüba kübok agi aser Dr. Chubatola Aier, Principal, CEC, Naga United ajanga pela agizükba o jembi.

HSLC & HSSLC Examination 2025 atema metetdaksür

Dimapur, Luroi/August 21 (TYO): Nagaland Board of School Education (NBSE) ajanga sangdong ka nung Regular, Repeaters aser Compartmental students atema HSLC & HSSLC Examinations 2025 asoshi forms fill up asüba maparen September 17 nungi September 30, 2024 tsüngta tembangtsü anogo latetogo, ta ashi.

Anungji item tatidang agütsütsü alirtemi mamadoki

NBSE portal nbsenl.edu.in nungi Application Firms agizüka fill up asütsü metetdaksür, ta ashi.

Institutions/centres temi shia aliba anogotem nung NBSE portal nung login süa form tem jangjatsüla aser candidate indang category balala nung examination fee menoktsüla.

Iba sülen application kata magizüktsü, ta NBSE sangdong ajangasa ashi.

ATMA Changtongya block ajanga tsünütsü anepaluyim sayu



Dimapur, Luroi/August 21 (TYO): ATMA Mokochung, Changtongya block ajanga August 19, 2024 nü Akhoya aser Unger yimdak aonsotsü anepaluba yimya balala sayua liasü.

Akhoya yimdak shisalen sayur Toshihena T Longkumer, ATM, Changtongya block ajanga mongpu nung adokba aonsotsü, talisa broccoli aser pokchoi

nunger anepaluba yimyatem sayua liasü.

Lai mapang shidak nung atemtsü, transplant asütsü, tetsüngta ita tsünütsü, tzü agütsütsü, mapang shidak nung aongtsü aser junga rizünga ayutsü indang yimya balala sayua liasü.

Ano parnoki Knol khol junga züsentettsü atema Ashinu Food security group dang demonstration sayua liasü.

Angh-i tepuokdak alirtem nem tatok agütsü

Dimapur, Luroi/August 21 (TYO): 78th Independence Day nüngtem nung state sorkari Nagaland kübok aibelen balala nung courts (Court Martial dak alaka) ajanga aitsür tepuokdak yua alir category balala nem tatok agüja parnok tepuokdak ayuba mapang ajemtsütsü telemtetba agia liasü.

Iba dak sendakba nung Angh-i Constitution of India indang Article 161 nung tashi agüja aliba amshia Nagaland aser dangalen tepuokdak yua alirtem nem tatok agüja parnok tepuokdak ayuba mapang yamai ajemtsü.

1. Küm 10 aser tema tepuokdak ayutsü obedang agüja alirtem anogo 30 ajemtsü.
2. Küm 5 nungi 10 tashi tepuokdak ayutsü obedang agüja alirtem anogo 20 ajemtsü.
3. Küm 1 nungi 5 tashi tepuokdak ayutsü obedang agüja alirtem anogo 10 ajemtsü.
4. Küm ka tashi tepuokdak ayutsü obedang agüja alirtem anogo 5 ajemtsü.

Ajisüaka item remission nung tsünglanglen agüja aliba categories of prisoners maden:-

1. Foreigners Act kübok aija tepuokdak alirtem.
2. Passport Act kübok aija tepuokdak alirtem.
3. Unlawful Activities (Prevention) Act kübok aija

tepuokdak alirtem.

4. Official Secrets Act, 1923 indang Section 3 to 10 kübok aija tepuokdak alirtem.

5. Criminal Amendment Act, 1961 indang Section 2 to 3 kübok aija tepuokdak alirtem.

6. IPC indang Section 121 to 130 kübok aija tepuokdak alirtem.

7. CrPC indang Section 107/109 kübok aija tepuokdak alirtem.

8. Prevention of Corruption Act kübok aija tepuokdak alirtem.


9. Narcotic Drugs and Psychotropic Substances Act, 1985 kübok aija tepuokdak alirtem.

10. Tetsür dak tashiyim amshia shi nung medemba, medemtsü merangba mesüra merenshiba nung aika tepuokdak alirtem.

11. Külem tepuokdak alirtem/ staff tem amokmerenba/ m e r e n s h i b a / r a r a b a n s e n b a / z ü k a merenshiba ama jail rules aser discipline nung aibelena aser temesepba chiyongtsü aser nokdanga aliba osettsüset shibelenba tepuokdak alirtem.

12. Acts mashi kübok aija aliba Foreign National.

Iba Remission Order ya August 15, 2024 nü nungi tenzükba amshitsü Nagaland Angh ajanga totuyuba agütsü.



August 21, 2024 nü Srinagar nung Aam Aadmi Party lenir, Imran Hussain-i Jammu & Kashmir AAP unit nung ketdangpurtem aser party nung inyakertem den senden mena taruba J&K assembly elections atema jembiba sülen tangokba noksa nung angur.

Sangküm India nunger astronaut ka ISS-i atutsü: Jitendra Singh

New Delhi, August 21 (Agencies): Bodhbarnü Science & Technology Union Minister, Jitendra Singh-i, NASA-ISRO külem mission kübok sangküm April ita tashi nung India nunger astronaut ka International Space Station (ISS)-i atutsüa akok, ta metetdaksü.

Tan ita tetenzüklen Indian Space Research Organisation (ISRO)-i, Axiom-4 mission to the International Space Station (ISS) atema India nunger Human Space Flight Centre-i USA nungi Axiom Space Inc den partnership yangluogo, aser iba atemaji India Group Captain, Shubhanshu Shukla shimogo, ta

sangdonga liasü. Iba mission atema National Mission Assignment Board-i 'Gaganyatris' ana prime aser backup pilot, Group Captain Shubhanshu Shukla (prime) aser Group Captain Prasanth Balakrishnan Nair (backup) na shima liasü.

ISRO-i sangdong ka ajanga, "Shima aliba crewmembers ji tatensa International Space Station-i atutsü atema shimogo. Tenüng agüja aliba 'Gaganyatris'-i August ita mezüngbuba hopta nungi iba mission atema training agi tenzüksü," ta metetdakja liasü.

Axiom Space Ax-4 mission atema India nunger astronaut anaji

US nung training agi tenzüko. India nung tang mezüng National Space Day amongtsü mapang ana nung lia Bodhbarnü Delhi nung osangbenertem senden ka nung jembidang union minister Singh-i, "Sangküm April ita tashi nungbo India nunger astronaut ka ISS-i atutsü," ta metetdaksü.

Yaküm August 23 nü India nunger Vikram lander ita nung junga anendakstetba anogo ya National Space Day asütsü sorkari shimogo.

Tang mezüngbuba National Space Day atema omenji 'Touching Lives while Touching the Moon: India's Space Saga' asütsü.

Andhra Pradesh nung aliba pharma unit ka nung nisung 15 asü

New Delhi, Luroi/August 21 (Agencies): Bodhbarnü Andhra Pradesh state kübok Anakapalle district nung aliba pharmaceutical unit ka nung langka apokba lendong nung nisung 15 asü aser nisung 30 yiruogo, ta ketdangsertemi metetdaksü.

Anakapalle district collector, Vijaya Krishnan-i, nikongdang 2:00 ako meta Escientia Advanced Sciences Pvt Ltd pharma plant nung iba lendong atalok, ta metetdaksü.

Iba plant ya Achutapuram Special Economic Zone nung lir. "Mi lendong ya chemical reactor apokba ajanga masü," ta Krishnan-i metetdaksü.

Iba lendong nung yirur nisung 30 shi Anakapalli aser Atchutapuram na nung aliba hospital balalai anir oa yaridar aser unit nungi nisung 13 kümzüko, ta lai metetdaksü.

Additional SP, (Anakapalle) Deva Prasad-i, "Iba unit nung shift ana lemsar mapa inyakertem parnok 381 lir. Parnok nikongdang chiyungba mapang nung mi lendong atalok, ibayongji mapang inyakertem ishika dang liasü," ta Krishnan-i metetdaksü.

Iba osang angashia chief minister N Chandrababu Naidu-i mangyim jashi lemsatepogo. Escientia Advanced Sciences-i 2019 küm nungi tenzüka

intermediate chemicals aser active pharmaceutical ingredients (API) yanglur, aser iba plant atema sen crore 200 indoka liasü.

Iba plant ya Andhra Pradesh Industrial Infrastructure Corporation (APIIC) indang multi-product special economic zone (SEZ) nung ali acre 40 nung amenoka lir.

Taoba ita nunga kasa district nungsa chemical factory ka nung reactor ka apokba lendong nung nisung ka asü aser ana yirua liasü.

Yaküm June ita nunga Atchutapuram SEZ nungsa Sahiti Pharma nung reactor ka apokba lendong nung nisung trok asü.

Tetsür anema inyakba atema MP/ MLA 151 anema ken o benoka lir: ADR

New Delhi, August 21 (Agencies): MPs aser MLA 151-i parnok indang election affidavits ajanga, parnok anema tetsürtem anema inyakba ken o benoka lir ta sangdonga lir, ta ADR-i metetdaksü.

Tetsürtem anema inyakba atema ken o benoka aliba MPs aser MLA teimtibaji West Bengal state nungi lir, ta poll rights body, Association for Democratic Reforms (ADR)-i metetdaksü.

ADR-i tang aliba MP tem aser MLA temi 2019 küm nungi election mapang nung parnoki Election Commission nem agütsüba affidavit 4,809 nungi affidavit 4,693 asadanga iba report renema liasü.

Item affidavits ajanga, MP 16 aser MLA 135 anemabo tetsürtem anema inyakba ken o balala benoka lir, ta ADR-i

bushitet. Item ama ken o benoka aliba MP aser MLA 25 bo West Bengal nungi lir (teimtiba), iba sülen tanabuba jenjang nung Andhra Pradesh nungi MP/ MLA 21 aser Odisha nungia MP aser MLA 17 anema tetsürtem anema inyakba ken otem benoka lir, ta ADR-i metetdaksü.

Party tem sasep nung item ama ken o benoka aliba MP aser MLA teimtibaji BJP nungi lir (54 MPs & MLAs), iba sülen Congress (23) aser Telugu Desam Party (17) na lir.

Ano tashiyim amshia tetsür raksatsüba ken o benoka alir MP/MLA tem BJP nungi pongu aser Congress nungia pongu lir.

ADR-isa ozüng alema inyakertem, talisa tetsürtem anema inyakba ken o alirtem nem party tickets magütsüsüla, ta takhangba agütsüogo.

Küm 45 tsüngda tang mezüng India PM kati Poland linük semdang



New Delhi, August 21, 2024 : Bodhbarnü Ato kilonser Narendra Modi, Warsaw (Poland)-i apusoa aotsü lia pai tayimtsü nungi ayiploksüba noksa nung angur.

New Delhi, August 21 (Agencies): Bodhbarnü nikongdang Ato kilonser Narendra Modi Poland tonga ogo; tang mezüng pai Poland semdangba dang masü saka tesüiba küm 45 tsüngdabo tang mezüng India Ato kilonser kati Poland semdang asütsü.

Küm 45 tejaklen taoba mapang Ato kilonser, Morarji Desai-i Poland semdanga liasü.

Modi-i X ajanga, "Poland tongogo. Yangi sentong balala nung adentsü yongyar. Iba linük semdangba ajanga India-Poland tesendaktep tajungba akümtsü aser asen linük nüburtem tajanzük angutsü imlar," ta metetdaksü.

Ministry of External Affairs (MEA)-ia sangdong ka ajanga, Ato kilonser Modi Poland yimtiba, Warsaw nung airport atongba mapang nung semdangtsü, aser ibaji India Ato ketdangsertemi pelaa agizük, ta semdang asütsü.

Poland nung Ato kilonser Modi-i Poland Ato kilonser Donald Tusk aser Tir, Andrzej Duda na ajurua senden amentsü. Paisa yangji aliba India nungertema ajurutsü.

Poland atongba sülen Modi-i Jam Saheb of Nawanagr indang memorial nung naro tokja asür nem akhüm agütsüogo. Paisa Battle of Monte Cassino monument aser Kolhapur Memorial semdang.

Bodhbarnep New Delhi nungi apusoa aotsü lia Modi-i, Poland ya India atema Central Europe nung rongsenkettzüng partner tulutiba lir, ta metetdakja liasü.

"Ni kü medemer Ato kilonser Donald Tusk aser Tir Andrzej Duda na ajurua linük ana tsüngda tesendaktep tajungba akümtsü atema jembitsü," ta Modi-i metetdakja liasü.

Hokolbarnü Narendra Modi-i Ukraine yimtiba, Kyiv semdangtsü, aser ibaji India Ato kilonser kati tang mezüng Ukraine semdang asütsü.



August 21, 2024 nü Himachhal Pradesh yimtiba, Shimla nung tzünglu sashia aruba sülen gari lenmang ka anenzüka lua ki raksaja aliba noksa nung angur.

यूको बैंक UCO BANK
(भारत सरकार का उपक्रम) (A Govt. of India Undertaking)

Zonal Office, T. N. Sharma Path, Nehru Park, Jorhat- 785001
E-mail: zo.jorhat@ucobank.co.in

TESEM AGINER

Bank-i ATM ka amenoktsü densema 'para' agüja carpet area 800 nungi 1000 sq. ft aginer, talisa Ground Floor aginer. Branch Office lapoktsü atema iba kiyong nung tesem aginer.

Branch	Area approx.	Preferred locality
Mon	800-1000 sq. ft.	Mon main market, Mon city, Dist.- Mon, State- Nagaland

Osang tejangjaji UCO Bank, Zonal Office, Nehru Park, Jorhat- 785001 (Contact No. 9931015772, 8852048234) aser Sonari Branch (Contact No. 8668704660) nungi agizüktsü akok mesüra onok indang website www.ucobank.com nungi download asütsü akok. Sealed application ji nungdakba documents den külemi single cover ka nung tsünglanglen sign süa alir dangi yoktsüla aser ibaji 04.09.2024 anogo tashi nungbo agizüktsüla.

Chief Manager
Date: 20.08.2024
UCO Bank, Zonal Office, Jorhat



TIR YIMYIM YIMOBILEM (EDITORIAL)

DIMAPUR YANGTEPNÜ, AUGUST (LUROI) 22, 2024

Tzünglu tulu arutsü, anü tatsük aputsü !

Tanü asüng ya tsüngsang mopong kangasa majungba agi mapang - mapang shia tsüngsang-mopong takzür Meteorological department ajanga anü kanga aputsüba anogo aser tzünglu kanga arutsüla anogotem indang takzua metetdaksür. Iba jagi nisungtema jelia pei mapa inyaksü atema tsüngsang-mopong takzürtemi metetdaksüba osangji apir sentong yanglur. Aji agi, takoksa angutsüba mapatem aika nungi kümzüker. Ajisüaka, tsüngsang mopong majungba dak sendakba nung government nung alirtemi tongtibang teinyaksü ka meinyakbaji, anü kangasa tsüka aputsüsa ka süra, nisungtem dang anü tatsük nungi kümzüka alitsü asosshi tekümdangtsü aser teinyaksübo kecha memetetdaksür. Kasaji, tzünglu kanga arutsüla süra tzünglu tulu aruba ajanga lendongtsüdong aser takoksa ataloktsüba nungi koda kümzüka alitsü ajibo memetetdaksür. Iba jagi metetsüsümonga tesem aika nung anü tatsük apu marem nübortem timtem takoksa angur aser tzünglu ajanga bener aruba tzümettsüng aser anentsü lendong nung nisungtem taküm dena samar. Itemji asen lima nung nübortem asoshi sentong yanglutsürtemi rajema ngulasang, nübortem dang anü tatsük aputsü aser tzünglu tulu arutsüba indang osang jelia metetdaksüba nungji tatem mekümi ' anungji' ta ser nübortem dang teinyaksü aser tekümdangtsü indanga külemi jelia metetdaksüla. Aji oda, tanga lima nungbo anü tatsük apuba nungi aser tzünglu kanga aruba nungi kümzüksü asoshi tang dang masü saka teti atema sentong yanglua nübortem nem inyakdaksür. Iba ama sentongji asenoka akatsü kanga nungdaker. Atangji, asenokbo sensaker lima asünungji bilemyonga tuluka meinyaktettsüa akok, ajisüaka tzünglu tulu aruba ajanga motzü yimpoka aiter ki dena mechireptsüsa aser lenmanga meraksatsüsa government-i jelia kilentzü ajak sademsadema lapoka aotsüla aser iba denji külemi nübortem dang pei alidakbo peisasa kilentzü ajak sademsadema merükteta lapoka toktsütsü asoshi metetdaksütsüla. Nisungtem aliba tesem aika nung kilentzü aolen maliba dang masü saka motzü yimzüka aotsüba ayongnu dena amenbanga ki asür, anungji tzünglu aruba mapang motzü taolen maka awatsüng küma atsüngdener, itemji jungjunga reprangshia yimten ozüngi yimkong ajungtsü aser lendong nungi kümzüksü atema inyaksüla. Aji oda, tenem nung alirtem alidak motzü aolen melira motzü jagi ki shipoka ayimtsü aser ki amendaka aliba long aser ali dena yimzüka bener orr kiji laotsüsa akümstsü. Aji oda, tekalen aliba ki ka laora, tsünglanglen aliba kitem ajunga dakji kongshitsü. Iba jagi nisung shia mulungjang nung yur government-isa meinyakyonga peisasa aser pei mepu aser kiyong yimteni kisüjensüba aser kilentzü yangluba mapatem ajak telatet inyakyim ka yur inyaksüla. Iba jagi memeteti aser meteta pei taküma dena kümzüksü. Kasaji anü tatsük nungi kümzüksü asoshia, tatishitsü agi, government-i nübortem dang anüngdang anü tatsük nung masü saka anepdang aser nikongdang anü tanük nung mapa inyaksü metetdaksütsüa akok. Kasaji, mapa inyakba aser kaketrejui aoba mapanga melenshitsüa akok. Aji oda, anü pua jajadang tokolak, tejak aser teben ajak sembanga asemstsü aser tzü kanga ajemtsü nungdak indanga yimteni metetdaksüra, iba jagi taküm aika kümzüksü. Iba amaji anü apudang aser tzünglu arudang nübortem nem tangatetba agüja len anitsübaji yimten aser lokti nung lenirtem mapa lir. Itemji tang khen atema teinyaksütem lir. Ajisüaka, teti anü tatsük nungi kümzüka alitsü asoshi asenoki asen alidak dang masü saka tangar alidak dena süngdong tempet tema oa nübortem ayonger inyakra, iba jagia tarutsü nung nübortem anü tatsük nungi kümzüksü.

OLEMSABANG

AO OSEP TASEN

~ P. Renthly Jamir.

Ao Lima nung Dr. Clark tebuttsü tenati küm 1878 nungi ABC ta sayua aruba tanü tashi Ao oshi nung kaket paika adoka lir. Saka tang tashi Ao oshi nung osep tabensa tajung kata adoka mali. Iba ya Aor lanur tazünger kari temulung agüja meinyakra ABAM, Ao senden telok balala daksa imla nungbo kodanga madoktetsü ta bilemer . Repranga arunung tanü lokti mapa nung inyakerkem ajak ya taah makabo nübu agütsünür mali. Aser oshi ka nung osep tai mali tabensa adoktsü mapa temela masü. Küm ana asem nung kodanga ojang tabensa bendena osep madoktetsü . ano kü mapang onok mapang nungsa renemstsü ta sünür tesa aser taah maka tabo ashir. Oshi ka atema osep adoktsü .Tagütsünür lira ojang bendentsü ita ana asem mapang agütsür menur aruba magizüktsü tasa benden nungbo tabensa kodanga masütsü ya aritep mapa masü. Shitakbabo tsüngtong oa noksa dena agitsüsa-a aliba karbo densemstsü koba sentsü, tatsü talang taku tanang item rasaa mezülura mangatetsü. English oshi Webster Dictionary temeteter aika senteper küm 36 nung renem ta ashir. Anungji osep ka adoktsü züpa züpa mebilemstsüla. Angazükba agi Aor temeteter Er.Lanuakümi Ao oshi ojang meyi metsü temabendena Ao osep adoktsü meranger ta angashi saka ajia koba tashi nung lir memetet.

Tang Ao sendeni ajaayanga Ao Riju-i anir Aor tazünger temeteter luden ka shimba teloki Ao osep tasenba mapa tembanger joko taküm kümsa adoktsü renema lir ta ashir.Aji angutsü asen Aor ajaki yongyaseta atateper.Imlar ojang kwi südir tashishitsü kecha meli-i adoktsü. Kechiyong ojang mamjemba mezülusembajibo tim dang saka ratetba ajak tai mali asütsüla. Napoleoni ashi ama tamakoktsü ojang ajakji Dictionary nung dang angutsü .Anungji Dictionary nung tetezü ratetba ajakji noklang nung noklang shitak asütsü tim. Lokti mapa nung teinyaksübo tasak teinyakerbo mali tai aputsü temela tai bushirbo aika. Ano tang koba Ao osep tasen tajung ka adoktsü lir iba nung ya ajemdaker (yagi teperi mekümdaktsüi) yangi maliba ojangtem ajak kata mezütoki menashia tang tantsü tambu Ao oshi meteter kar alidang ya tsüngtong oa asüngdangtepa bendena tali tebensaba , adoktsü lanur temeteter kari inyaksüla. Kechiba English oshibo alima kin ajaki jembiteter ta süra parnok Dictionary talubosa tajungba tabensa adoka lir . Pocket nung semer senzütsü onsara tila dena lir. Ano tanurtem atema children's Dictionary noksa teperi dena adoka lir. Ao osep tajung ka nungdaker ta nübur ajaki jembi. Anungji onok ABAM Literature & Education Board member asüdang ABAM tenüng nung Ao osep tasür Dictionary ka küm 2005 nung adok. Iba kaket sayatsü atema Minister Dr Sürhozellie jaok. Onoki adokba Ao osep kaketji page 207 liasü. Saka pai parnok Tenyimia purtemi Tenyidie oshi nung adokba Dictionary kaket volume tuluka bener arua agütsüdang Aor pioneer ta asüba to ya no ta nüma matang aakseta liasü. Angami oshibo Nagaland University nung 1997 nungi agir aser Ph.D tashi agütsür.

Tang Nagaland State Government-i Ao oshi atema tesayur koma agütsür ta bushidang nung akhidang Class 8 tashi sayutsü agütsüba dak alema tang tashi ano Class 9 aser 10 atemabo Ao oshi sayutsü tesayur magutsür ta ashir. Anungji item tesayurtemjagi ariananga Class 9 aser 10 Ao subjectji sayur. Aser College nung Ao oshi sayutsü atema Fazl Ali College nung fixed pay nung tesayur ana agutsü aser NPSC interview ajanga ana shim ta ashir. Ano tetamatsükaji Secondary Class 11 & 12 atemabo kecha osang mali. Tang Education department aser Ao oshi tesendaktep metetogo. Joko Ao oshi Arangtet tatidang agir küm 18 (2006) abensar ano küm nung anaben anaben agira küm 9 ajunger. Süra Ao oshi Arangtet tatidang mezüng küm nungi tenzüka course matem tashi agütsür takok angur kwi alitsü. Aser teimba joko mapai aitsü küm sülogo. Ano ajaki metetsübaji Arangtet tatidang nung passed asürtemibo Ao oshi jungjunga meteter ta masü. Parnok ya zülumen yimya tasenba temelenshiba koma koda amshia sayutsü itemji tera tera angazükba dang lir. Saka Ao oshi tetezü taroktem teratet parnoki meteta mali Anungji Ao oshi angazüka metettsü Ao osep tabensa tajung ka dang masü asem pezü akatsü nungdaker. Saka tang tashi school nung azüngtsü text book peria maka aser Dictionary mali Ao oshi tesamar ya wazüka ayutsüla tabo An chanuia dena mechishia bangpet jembir.Anungji iba tayimtenba ola ya tazüngla kümdaktsür. Ao sendeni anir Ao Riju meranga inyaker saka tokolak mekioka yur tepen arakzür dang, kechiyong State Governmenti tesayur magütsür aser meteta alirtemi angadi sayutsü masü.

(Mamemi asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Protestant shilem 11-i Tejen Lai aser Tasen Lai mebendangteter

August 21, 2024: America nung Protestant Khristantem shilem 11-i Tejen Lai aser Tasen Lai mebendangteter; parnok dang Tejen Lai nung parnok sapuba otsü asüngdangba mapang nung parnok Tasen Lai nung aliba otsü dang lemsatsep.

Tawa Lifeway Research-i "Protestant Churchgoer Views on Bible Stories" ta ser report ka sangdongogo. 2023 kum September ita nung agiba survey nungji America nung Protestant Khristan 1,008-i shilem agia liasü.

Protestant Khristantem dang, "Tejen Lai nung aliba otsü ajak dang nungi nai tesaputiba otsüji koba?" ta asüngdanga liasü.

Iba survey nung shilem agir 13%-i Anitet kakat nung Mosa otsü tajungtiba ta ashi aser shilem 11-i Noah aser rong otsü tajungba, ta ashi.

Tejen Lai nung nai tesaputiba otsü koba? ta asüngdangaka telangzüba agütsür aikati Tasen Lai nung aliba otsü mesüra Tejen Lai nung aliba kakat kar dang ashi.

Ano shilem 7-ibo Tejen Lai nung parnok sapuba otsü mali,

ta ashi. Iba tetezü survey nung shilem agir shilem 79-i Tejen Lai otsütem mesüra Tejen Lai nung aliba kakattem meteta liasü.

"Tenla kidangi aoertemi Tenla kidang Laishiba lapoka alitsüa akok, ajisüaka nisung pongu shia nungi katibosa Laishiba junga meteta mali mesüra Tejen Lai o Tasen Lai na mebendangteter," ta Lifeway Research nung CEO, Scott McConnell-i metetdaksü. Scott-i, "Tenla kidangi aoertem rongnung karibo Laishiba azüngba nung mapang tera dang indoker aser karibo Laishiba indang kecha meteta mali," ta ashi.

Iba survey nung shilem agir Protestant Khristantemi Laishiba nung parnok sapuba kakattem aser otsütem yamai liasü; shilem 10-i Lipok kakat sapur, shilem 8-i David aser Goliath otsü sapur, shilem 5-i Adam aser Eve kakat sapur, shilem 4-i Yob otsü sapur, shilem 4-i Ruth otsü sapur, shilem 3-i Yosef otsü sapur, shilem 3-i Daniel otsü, shilem 2-i Esther otsü, shilem 2-i David otsü, shilem 2-i Tenüngsang

Ken kakat, shilem 2-i Cain aser Abel otsü, shilem 1-i Abraham otsü, shilem 1-i Elijah otsü aser shilem 1-i Samsun otsü sapur.

Tejen Lai nung David aser Goliath otsü dak sendakba nung survey nung shilem agir 34-i iba otsü kanga junga shitetsü ta ashi, shilem 39-i iba otsü shitetsü saka karbo tera tai asütsüa akok, ta ashi.

Iba survey nung shilem agir shilem 24-i Daniel aser molusongzü kangla otsü shitetsü ta ashi aser shilem 39-i Daniel aser molusongzü kangla indang otsü tongmelang agibo shitetsü, ta ashi. Ano shilem 1-ibo iba otsü ya Laishiba nung mali, ta ashi.

Shilem agirtem rongnung shilem 29-i Tsüngremi Abraham dang par jabaso Isaac tenlatsü asüngdangba otsü tatongi shitetsü ta ashi aser shilem 35-i iba otsü tongmelang agi shitetsü, ta ashi.

Shilem agi shilem 35-i Yona aser ango otsü junga shitetsü ta ashi aser shilem 28-ibo iba otsü tejangja shitetsü, ta ashi. Shilem 8-ibo iba otsü junga meshitetsü ta ashi. Ano shilem 2-ibo iba otsü ya Laishiba nung aliba memeteti liasü.

Church of England kübok Arogo tasen aikati 'Arogo' nungja mamshir

August 21, 2024: Church of England (CofE) nung Arogo tasen aikati 'Church' ta nungja mamshir, ta report tasen ka ajanga metetdaksü.

Züngsem taliba atsüer arutsü nükjidong nung Church of England-i "Arogo" nungja agienadoker asütsüa akok, ta report nung shia lir.

"New Things: Church of England nung Dioceses 11 nung Arogo tasentem tenzüka bushisüngdangba ajanga tesüiba kum 10 tsüngda Arogo tasen 900 shi tenzüksüogo saka item Arogo tasen jagi 'Arogo' nungja

mamshir, aser dioceses 11 pronglaia "church" ta mamshir," ta report nung shia lir.

Iba report ya Centre for Church Planting Theology & Research, Cranmer Hall, Durham nung sangdonga liasü.

Iba research ya November 2022 nungi June 2023 tashi nung agia liasü; research agiba mapang nung dioceses 11 nungjagi ketdangsertem interview agia liasü.

Durham nung aliba St Nicholas nung Vicar, Rev. Will Foulger-i iba report ji renema liasü.

Diocese 11 nungjagi diocese 6-i Church ta masü "worship" ta amshir, diocese anati "congregation" ta amshir aser diocese teneti "community" ta amshir.

Kasa report ajangasa Church of England indang theology nung nungja tasen amshiba atema tebilemstü katsüba lemsatsep. Iba ama nungja tasen amshitepba ajanga Arogo ka tangatetba nung kongshitsüa akok, iba denji külemi Arogo mission aser ministry nunga temelenshi alitsü südi ta bilemer.

ANO GO ABEN TSÜNGREM DEN

Kecha asoshi shisatebulu

Kecha nunga temulung tatemala saka ajak nung sarasademba aser mepishiba aser tenüngsang agi nenoki meshiba Tsüngrem nem metetdakjang.

Filipi 4:6

Temulung tatem! Tsüngrem chir ka kecha agia temulung atema mekümdaktsütet ta Pauli ashi. Shisabuludaktsüba mapa mita liasü. Par kin bendanger armyi agir tashir tamajungi yimsü süa liasü. Pa tiyazü kuli ajanga taitesüba agütsür tepuokdak nung alidang zülu. Pai meimbatem nungi pa pilar liasü, pa tebilembatem asüngdang aser mashilen angatet. Kari pai arogotem tenzüka takok ngua inyakba maginü. Pa temang timatem aser teti rishikangshi ajuru (2 Kor. 11:23-29). Aji saka Pauli ashi, Tsüngremi yimjung magütsütetsüsa idakji timtem kecha mali!

Tsüngremi ne timtem agentsü menüngdak saka Pai khuji na asoshi abentsü. Pai nai Pa tesünep metetdaksüner, koba meimchiri angatetsü makok. Tia kar nung Tsüngremi ne nem agütsüba tesünep/yimjung Tsüngremi koda agütsü nai ajungajibo mangatetsü saka ibaji ajurutsü asoshi nai angatetsü menüngdak. Iba tesünep ya shirnoki junga bushir parnok atema dang masü, ibai ajak atema lir!

Tsüngremi na yimjung nung lidaktsüner ta metetsü akok, saka tang nai kechi ajurur ibai ya koda takoktsü ta süngmangtsü akok. Aji saka Laishiba kecha nung temulung tatem. Tsüngrem tsüngdang kecha tamakoktsü, tetsübuttsü, timtem mali ta tejangja ashir. Kechi shisabulu südir süang Tsüngrem yimjung tesünepi ne mulungjang nüka lidakjang.

UP nung anti conversion ozüng kübok kum 4 tsüngda nisung 1,600 apu

August 21, 2024: Tesüiba 835 nungi ken o 818 benokogo, kum pezü tsüngda Uttar Pradesh nung anti conversion ozüng kübok nisung 1,682 puogo, ta International Christian Concern (ICC)-i metetdaksü.

Sahu Johar-i, "Anti-conversion ozüng kübok ka danga aitsü asünungbo sorkar pusemba media-i national media nung item osangji prokshir lila. 1,682 apu aser ken o 835 benok; Iba ozüng kübok apuba nisungtemji teimbaka tiyazü nung tai tonglokja apuba lir," ta metetdaksü.

Takum July ita nung Uttar Pradesh state sorkari iba ozüng ano tesashiba akümtsü aser temerenshi tuluba alitsü atema Uttar Pradesh Prohibition of Unlawful Conversion of Religion Act nung BJP-i aniba sorkari Uttar Pradesh Prohibition of Unlawful Conversion of Religion Act benoka lir.

Tesüiba kum pezü tsüngda Uttar Pradesh nung iba ozüng kübok apuba nisungtem rongnung Prayagraj nung aliba Sam Higginbottom University of Agriculture, Technology & Science nung vice-chancellor aser pro-vice-chancellors ana densema lir.



Billingham, County Durham nung aliba St. Cuthbert Arogo Tenla ki noksa nung angur. Iba Tenla ki ya 845 AD mapang nungi lir. Iba ya jila nung tongti Tenla ki liasü, ajisüaka senotsü teyari manguba den külemi Arogo züngsemtem kanga ajema akümba ajanga iba Tenla ki junga anepalu mesüteter.

AO OSHI ANGAZÜKDAK:
TANÜ ANGAZÜKTSÜBA OJANG



Tamak

(adj) süngo sentsü (green)

* Pakistan nunger wako sentsü tamak lir.

Tamakhangtsü

(adv) tamakoktsü ka meshiba (impossible demand)

* Tanur tamajungi tsürabur dang tamakhangtsü akanger.

OLONG PAITEP # 6902

1					2			3
							4	
5		6			7			
8								9
							10	
				11	12			
		13						
14					15			
				16				

TIPIEN

- 1. O jembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüik asendak - 5
- 14. Tsüingpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjidong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6901 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioiktsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA



Alima nung mobile phones teimtiba bendena aliba nisungji Spain nunger Wences Palau Fernandez lir. Fernandez ya Barcelona nung alir aser pai mobile phone model balala 3,615 tashi bendena lir ta Guinness World Records (GWR) ajanga metetdaksü.

Fernandez ket nung Siemens, NEC, Motorola, Blackberry, Samsung, HTC, Apple aser tanga company indang mobile tem lir. Maneni pai jenjang aketba mobile phone bendena aliba rongnung Nokia 3220 Star Wars Ep III collection limited-edition models dena lir.

Fernandez-i Nokia 3210 ka ajanga mobile phones saputsü tenzük. 1999 küm pa nem iba mobile ya Christmas gift ka ama agütsü aser 2008 nungi pai Nokia phone ajak bendentsü tenzüka liasü ta GWR website ajanga ashir. 2018 tashi nung Fernandez-i Nokia models balala 700 tema benden aser iba sülen pai tanga company indang mobile phones bendentsü tenzük.

Rameswar Teli aser Ranjan Das nati RS election atema tenüng agütsü



Guwahati, August 21, 2024

(Agencies): August 2, 2024 nü Assam nung BJP tanishirtem Ranjan Das aser Rameswar Teli nati Rajya Sabha candidates ama nominations süogo.

Iba sentong nung Assam Chief Minister Himanta Biswa Sarma aser Union Minister Sarbananda Sonowal na den

tongtipang lennir aika aden aser iba ajanga Assam BJP-i tena pusema nungitba sayuogo.

"Künati küm aika BJP tenzüka arur aser iba lemtet ajanga züngsem tasen aser tejenpurtem pelar" ta Rameswar Teli-i ashi.

Prime Minister Narendra Modi, Union Home Minister Amit Shah, Chief Minister

Himanta Biswa Sarma aser BJP National President JP Nadda nungeri küna pusema nungitba atema pelar ta Teli-isa ashi.

Assam nung yimtenren tensa repangdangra opposition candidate kati danga tenüng magütsü lir aser küna den tetokteper shinga malitsü ama sayur ta paisa ashi.

Mizoram-i refugees indang biometric data ano mebenden

Aizawl, August 21, 2024

(Agencies): Mizoram state sorkari refugee tem indang biometric data ano mebenden lir ta Home Minister K Sapdanga-i ashi.

Opposition Mizo National Front (MNF) MLA Robert Romawia Royte-i asüngdangba ka langzüdang "iba atema state sorkari Ministry of Home Affairs den jembidar" ta langzü.

Tesüiba nung Chief Minister Lalduhoma-i biometric

enrollment portal yangluogo aser tarutsü nung data bendentsü ta shia liasü.

Prime Minister Narendra Modi aser Union Home minister Amit Shah nati ashiba ama biometric enrollment portal renemogo ta CM Lalduhoma-isa ashi.

Union Ministry of Home Affairs-i April 2023 nung Myanmar den arrtsütepa aliba Mizoram aser Manipur state sorkartem dang ozüng alema arurtem biometric & biographic

details bendentsü tetuyuba ka agüja liasü.

Yaküm June ita Ministry-isa September ita tashi nung iba mapa tembangtsü aser state anaprongi sentong renema inyaksü tetuyuba agütsüogo.

Ajisüaka, September 2023 nung Council of Ministers senden ka amendang November ita assembly election agütsü aliba ajanga biometric aser biographic enrollment magitetsü ta telemtetba ka agi.

Assam police-i lanur aika ashioktsüba nisung ka apu

Guwahati, August 21, 2024

(Agencies): Assam Police-i August 21 nü Rohit Sarkar ta ser nisung kati Central GST department nung mapa agütsütsü ta shia nisung aika ashioktsüba atema tai tonglokja puogo.

Rohit Sarkar-i Dhubri nung lanur noklang aika ashioktsüogo aser iba asoshi pai lanurtem dang Rs 4,000 aser Rs 5,000 meshia agi. Pai Central GST brand kübok taila seals aser stamps yanglua amshi.

Bodbarnü lanur noklang

aikati Sarkar dang nungi parnok mapa anguba shidi ka anguba ajanga aoksatep. Sarkar nem sen agütsüba lanurtem nem taila appointment letters agütsü aser iba sülen police-i pa apu.

Sarkar-i mezüngbo August 20 nü appointment date ta shia liasü saka pai lanurtem dang August 21 nü Dhubri Central GST office nung oa mapa tenzüktsü mepishi.

Lanur noklang aika tanü service inyaksü atema aodang parnok nem agütsüba

appointment letter ji taila ta meteta aküm. Iba sülen parnok kar RK Mission Road nung Sarkar-i kidangi oa raratep.

Iba osang angashia police tesem tonga ao aser Sarkar apu. Police-i par kidang nungi taila appointment letters aser official seals aika ngutetogo.

Sarkar nem sen agütsü appointment letters anguba lanurtemi pa dang nungi anogo 10 nü training agia liasü. Police-i iba tatalokba atema maneni bushisüngdang südar.



Tripura nung State Disaster Response Force-i nisungtem anienba noksa nung angur. Tripura tzümetsüng lendong balala nung nisung 8 süogo aser kibong 5,600 tashi pei talidak yutsür relief camps nung jenoka lir. Tripura nung Deobar nungi tzünglu kanga aruba ajanga tesem aika metsüngbanga lir aser ayong pezü nung tzü mesemi ayimer. Sorkari relief camps 183 tashi lapoka lir aser National Disaster Response Force, State Disaster Response Force, Fire Service, Border Security Force aser Tripura State Rifles telok 200 tashi mapa lezmüksüogo.

Israel-i Gaza nung market aser school amak



Gaza City, Luroi/August 21 (Agencies): Gaza nung kanga mazüngi aliba market ka aser tesem balala nungi nüburtem adenshia jenoka aliba school ka nung Israel sepaitemi amakdang Palestine nung 20 asü. Gaza tiyonglen Deir el-Balah nung nisung agi mesemi aliba market ka nung Israel-i Mongulbarnü amakdang Palestine nung ti asü aser ano nisung tali asütsü akok, ta yangji osangbener kati ashi. "Iba tesem ya market anasa, aser kanga mazüngi aliba tesem ka lir. Gari aika liasü, anungji nisung aika asü," ta osangbener Hind Khoudary-i ashi. Al-Aqsa Hospital nungi kilometre ka majung pilar iba tesem amakba nung tanur aika yiru, ta lai ashi. "Tanurtem densema Palestine nung ter tang tashi ICU nung lir aser parnok aika takum kumzüksü teimla kangabo mali," ta Khoudary-i ashi. Aji masüdang Gaza City

anüolen Israel-i school ka amakba nung nisung 12 asü aser aika yirua liasü. Emergency crews temi takum alirtem bushir, aser nisung ter dak tema iba school ki laoba agi nembanga alitsü südi ta amanger. "Ozü teloki Mustafa Hafiz school nungi nisung tasü mang 12 ngutetogo, kong Israeli occupation ajanga bomb pokloksü," ta Gaza indang civil defence agency odongtar Mahmoud Basal-i Mongulbarnep osangbener dang shia liasü. Iba school nungya Palestine nung ter tesem balala nungi nisung 700 shi adenshia liasü, ta civil defence keddangsur temi ashir. Yirur alirtem ya Gaza City nung aliba al-Alhi Arab Hospital bushia bener ao. Israel army temi school nung Palestine fighter temi command centre ama amshidak amak ta ashir, ajisüaka parnoki Gaza nung school ki amakdang yama jembir saka kuli tejanga magütsür.

United Nations Security Council ajanga tekeraba nung ceasefire alitsü pangzüng renema liaka Israel-i Gaza Strip nung tanen makai amakdang schools, hospitals aser tekülem agiba tesemtem densema civilian facilities nung tenük yoker amaker. Israel-i October 7 nü nungi tenzüka Gaza amakdang Palestine nung nisung 40,200 dak tema tepsetogo aser nisung 92,857 yirutsüogo, ta yangji aliba Health Ministry ajanga ashir. Kasa mapang Gaza nung ceasefire alitsü atema tang tesüsa inyaktepba nung shilem ka ama US Secretary of State Antony Blinken-i Mongulbarnü Egypt aser Qatar nung külemi ken o jembirtem ajurua liasü, ajisüaka Hamas aser Israel-i ceasefire alitsü temelabo masü ta ashir. Sangdong ka nung United States-i ceasefire ken o melenshir aser Israel tsütsü tenok shibanger bhukuma inyaker, ta Hamas-i aitsü.

Aibelen tesü, ibai rara ka asütsü: Barrack Obama



Chicago, Luroi/August 21 (agencies): Mongulbar aonung Democratic National Convention nung Michelle aser Barack Obama nati Kamala Harris bhukuma jembir aser US tesem ajunga nung party bhukumertem dang November ita Donald Trump madak takok angutsü atema vote agütsütsü ayongzük. "Teimla tanaben meyiba shilanger," ta Michelle Obama-i Chicago nung DNC sentong nung ashi, koba la kinungbo nübuyimba mapang nangzükba "teimla aser temelenshi" nungi bendenlokba o ka lir. Tenati melentepa jembidang Democratic Party nung nungtugutiba nisung ana yagi Harris tenüng sanga jembir aser Trump aitsü aser pa tir inyakba mapang ain adoka jembir aser

rongrongshirong agi sünger liasü, ta Obama-i ashi. Ajisüaka tenati party züngsemtem dang zübazülema malitsü ashi. Tongtipang states kar ajanga iba election nung telemtetba agitsü ta parnoki ashi. "Aibelen tesü, ibai rara ka asütsü," ta arishi küm 63 tai taoba tir Obama-i ashi. "Temulung melemi malitsüsa asenoki vote jenti agütsütsü nungdaker. Asenok ajemreptsü meranger madak asenoki takok angutsü nungdaker," ta arishi küm 60 tain Michelle Obama-i ashi. Asenok chapter tasen ka atema renema alitsüla. Tir Kamala Harris atema asenok renema lir. Aser Kamala Harris iba mapa atema renema lir, ta Obama-i ashi. Obama-i democrats tem dang November nung temai adoka vote agütsütsü ayongzükba ajanga Harris aser Trump tsüngta tepila kangabo maliba atema party arendaka bilemba ajiteter. National polling averages nung Harris ya tera agi temaba jenjang nung lir, saka pollsters temi tongtipang states kar nung

tena kasa dang lir ta ashir. Harris ya technical tsütsü nungibo tir ka ama inyaka liaka lai la aser la indang running mate Minnesota Governor Tim Walz ya iba tetoktepba nung dangar memenep ta ashir. Trump-i lar kibong tanen makai anemba atema Michelle-i aitsü aser nüburtem jenjang tajungba nung alitsü atema asangdang shisatsü aser solutions bener arutsü kin dak rangloker tiazü ang maneni jembir, ta ashi. Iba aonung ola tulutiba adokba ya Trump-i nübuyimba mapang "black jobs" indang o jembir Michelle-i menütsüdang adoka liasü. "Pai tang inyaktsü bushiba mapa ya black jobs rongnung ka asütsü südi ta pa dang shibai ashtsü," ta lai la kinungbo tir inyakba athishia ashi. Michelle-i iba sapang amshia la tetsür asür Marina Robinson bilemteta liasü, shiba küm tetenzüklen arishi küm 86 nung asü. "Taonung nenok matsüngdang nokdaksü ni mejangjai liasü, saka kü mulungjang nung ajungmesoba ka liasü," ta lai telok dang ashi.

Office of the
PATIZUNG WARD COMMITTEE
TULI TOWN
P.O. Tuli – 798618
Dist. Mokokchung, Nagaland
TENÜNGSANG AGÜTSÜR




Sd/-
Wb. Moatoshi Imsong
Chairman, PWC Tuli

Ministry of Agriculture and Farmers Welfare, Government of India ajanga **Sp. Lepzungchiba Jamir**, S/o Wb. Süsüukshi aser Wt.Ozungtula (Merangkong Village)-i life member, Representative Nagaland nungi category (A)-Corporate member National Bee Board (NBB) jenjang ngutetba atema Patizung Ward Committee ajanga tenüngsang agütsür aser pelaba lemsateper.

Maneni nü takum aser wadang

ajak nung Tsüngrem lenisüba denang ta sarasademtsür.
Sd/-
Wb. Imliwabang
Gen. Secy., PWC Tuli

OFFICE OF THE
MOPUNGCHUKET SENSO TELONGJEM KOHIMA
KOHIMA : NAGALAND



TENÜNGSANG AGÜTSÜR
Mopungchuket Senso Telongjem Kohima (MSTK), Ao Temulungtsür Telongjem Kohima (ATTK) aser Mopungchuket Ait Laishir Telongjem Kohima (MALT-K) ajanga lenla balala nung takok tulu angur nem tenüngsang aser aküm tetushi tulu agütsür:
1) **Mr. Temjen Aier**, son of Mr. Karimeren Aier, tangar dang nungi balaka alakteta Arts (Painting) nung tajungtiba inyaktetba asoshi Governor's Award ngutet.
2) **Er. B. Akala**, wife of Mr. Takatemjen Jamir, Sr. Computer Programmer (PIMS), P&AR Deptt., Govt. of Nagaland, la keddangsur Personal Information & Management System (PIMS) mapa takok ngua inyaktetba asoshi Governor's Recommendation Certificate angu.
3) **Dr. Wapangsunjla Lkr**, daughter of Mr. Taliwati Lkr, Journalism and Mass Communication azüngba nung lai züluba thesis titled "The Role of Radio Broadcasting in Development: An Empirical Study of Nagaland" nung Ph.D. degree Lovely Professional University, Punjab nungi angu.
4) **Miss Tiani Lkr**, daughter of Dr. Temjen Lkr, BA (Hons) Degree Mass Communication, Assam Don Bosco University, Guwahati, Assam nungi azüngba nung temaba jenjang (with a CGPA of 8.34) tongtetba asoshi Gold Medal angu.
5) **Miss Sungjemjungla Aier**, daughter of Mr. Sobuyanger Aier, BA Education (Hons) Degree azüngba nung Top 4 position (with a CGPA of 7.34) St. Joseph's College Autonomous, Jakhama nungi takok angu.
Tarutsü anogotem nung parnok wadang balala nung Tsüngremi temoatsü aser takok nung aniangma ta sarasademtsür.
Sd/-
Onen Ozükum
President, MSTK
Sd/-
Ayimpongla Aier
President, ATTK
Sd/-
Sensopong Aier
President, MALT-K

Ukraine-i drone amshia Moscow amak
Moscow, Luroi/August 21 tesashitiba lir.
(Agencies): Ukraine-i drone amshia Bodhbarnü Moscow tesashitiba makogo, ta yimti mayor-i ashi. Russian air defence unit temi linük yimtiba leni yima arua aliba drone 11 khadanga liasü. Drone tem ya karbo Podolsk yimti anasa raksatsü, ta Mayor Sergei Sobyenin-i ashi. Moscow temeket nung aliba yimti ya Kremlin nungi km 38 shi pilar lir. "Drone amshia tang Moscow tesashitiba amaktsü merangogo," ta Sobyenin-i Telegram messaging app ajanga ashi. Ukraine-i Kursk tesem amakba nokdaksü timtema aliba mapang tang Moscow makogo. Ukraine nung sepaitemi Russia anüolen arrtsü rakpoka ia tesem balala atsünga odar, koba World War Two sülen Russia amakba

Sobyenin-i ashiba agi, iba lendong nung nisung asüba mesüra yiruba indang osangbo kecha mali. Ukraine-i ita ishika tsüngda yimya agi drone ka ana agi dang Moscow maka arudar aser iba ajanga teraksatsüba balakabo madokdaksür. Ajisüaka Bodhbarnü drone amshia amakba ya 2023 küm May ita drone amshia amakba dang nungi tesashiba liasü. Iba mapang drone ti tashi raksaja liasü aser tir Vladimir Putin-i ashiba agi, Kyiv-i Russia nung tsübudaktsütsü aser rongmesotsü meranger. Russia nung keddangsurtemi yimya agi teraksatsüba adokdaksüba indang ajakbo mesangdonger aser parnok indang air defence unit temi raksatsüba drone tem indang dang metetdajka liasü. **(Maneni tapak 8 nung...)**

Mokokchung nung Luke Sasong Memorial Volleyball Trophy asayadagi



MDVA Tir Imtipokym, Mangmetong Kaketshir Telongjem lenirtem, Luke Sasong porting Association lenirtem aser mezüing asayatsü pur telok anaMH 10 Kohima aser CVA külemi tangokba noksa.

Mokokchung, August/Luroi 21(TYO): 13 Buba Luke Sasong Memorial Volleyball Trophy tanü Multi-Purpose Sports Complex, Mokokchung nung Wb.Imtipokym Mokokchung District Volleyball Association Tir tetushi tejaoker ka ama akhüm aguja tenzüksüogo.

Mokokchung nung volleyball asaya ajungketsü talisa lanur asayar anitetsü tangatetba tulu nung iba asaya tetoktepba Mangmetong Kaketshir Telongjem akhüm nung Luke

Sasong Sporting Association-i(LSSA) temelung agüja inyakba asoshi tetushi tejaoker Wb.Imtipokym-i MDVA tenung nung tepelaba metetdaksü.


MDVA Tir-isa Naga nunger rongnung nungtugu nisung asür Luke Sasong nüngtem nung iba asaya tetokpba ayongba ya kanga dang shisa kaa apitetogo, kechiaser iba ya ajanga asür Luke Sasong-i nübür asoshi mapa tajung inyakbatem bilemtetsü ta lemsatep. Iba tetoktepba nung shilem agir

ajaki kati ka den temba yimtepa yimjung nung asayatsü paisa asayartem ayongzük.

Taküm iba 13 Buba Luke Sasong Memorial Volleyball Trophy team 12-i shilem agidagi aser item rongnung Kohima, Dimapur aser Wokha nungia aruagi shilem agidagi.

Tanü mezüingbuba asaya MH 10 Kohima aser Changtongya Volleyball Association (CVA) tsüingda asayaba nung MH 10 Kohima -i CVA 25-21 aser 28-26 points ngua koka liasü.

Foden nem PFA player of year naroküm agütsüogo



Luroi/August 21, 2024 (Agencies): Manchester City midfielder Phil Foden nem Professional Footballers' Association men's player of the year award aser Chelsea winger Cole Palmer nem young player of the year award agütsüogo.

2009-10 campaign sülen tang mezüingbuba tebur indang award anaprongla England nunger asayartemi agizükogo.

2009-10 season nung Wayne Rooney aser James Milner nati player aser young player of the year award agizüka liasü.

"Iba naroküm anguba ya kanga balaka aser iba atema ni kanga pelar aser nema adanger," ta Foden-i ashi.

"Külem professional temi yamai tetushi agütsüba ya kecha den medemdangtsü makok aser kü nem vote agütsür ajak dang kanga pelar.

"Taoba season club dak sendaka alir ajak atema kanga jangrademtsüka liasü, saka tang onok ano takok nguyonga aotsü asoshi rangloker lir," ta pai ashi.

2023-24 season City-i Premier League title pezübenbuba atonga akokba mapang Foden-i asaya 35 nungi goal 19 idakja liasü aser arishi küm 23buba nung pa ya league title trok abenba asayar tanobusang lir.

Pai 2023-24 Premier League

player of the season award angu aser kasa küm Football Writers' Association (FWA) footballer of the year naroküma ngua liasü.

Foden-i külem City teammate Erling Haaland aser Rodri na aser Chelsea nungi Palmer, Arsenal nungi Martin Odegaard aser Aston Villa nungi Ollie Watkins nunger ajateta iba naroküm nguogo.

Kasa mapang nung Chelsea nungi asayar arishi küm 22 tain Palmer nem young player of the year award agütsüogo. Pa Chelsea nungi mezüingbuba asayaba küm pai Premier League asaya 34 nungi goal 22 idakja liasü.

Season kanga junga asayaba sülen pa Euro 2024 atema England team nunga züngoksem aser pai Spain den final asayaba mapang goal ka idakja liasü.

Iba award atema Palmer-i, Arsenal nungi Bukayo Saka, Manchester United nungi Kobbie Mainoo aser Alejandro Garnacho na, taoba Crystal Palace nungi asayar Michael Olise aser Brighton nungi Joao Pedro nunger ajateta liasü.

Tetsürtem rongnungi Manchester City nungi asayar Khadija Shaw-i player of the year award angu aser Manchester United nungi Grace Clinton-i young player of the year award ngua liasü.

SVEEP sentong nung shilem ka ama saisapong balala ayongzüka asaya



SVEEP sentong kübok asaya balala ayonmgzüka asayaba mapang kaketshirtem sack race nung shilem agiba noksa nung angur.

Dimapur, Luroi/August 21 (TYO): Systematic Voters' Education and Electoral Participation (SVEEP) sentong nung nung shilem ka ama "Sports for votes" omen nung ajemdaker St. John College, Dimapur, aser Dimapur Government College nung saisapong balala ayongzüka asayaogo.

Asaya sentong ya St. John College, Dimapur nung August 16 aser 17 nü aser Dimapur Government College nung August 19 aser 20 nü ayongzüka asaya liasü.

Iba asaya sentong ya Nagaland Sports Association den longjemer Office of the

Deputy Commissioner aser District Election Office, Dimapur nati ayongzüka liasü. College anaprongla nungi kaketshir 600 dak temai iba sentong nung shilem agi, koba lanur voter tem nem electoral awareness agütsütsü nükjidong nung ayongzüka liasü. Kaketshirtem EPIC (Electoral Participation and Inclusive Citizenship) asayamung nung futsal, arr atsütepba, three-legged races, aser sack races amala asaya balala nung shilem agia liasü.

Asaya balala dak alaka voter facilitation booths aser EVM (Electronic Voting Machine) demonstration

center tem amenoker, kaketshirtem nem vote agütsüba yimya dak sendakba nung tangazükba agüjka liasü. Nagaland Sports Association tir Christine Imlikokla lenisüba nung asaya balala asaya aser asayamung ajanga tangazükba balala agütsüogo.

ADC & SVEEP Nodal Officer, Dimapur Zakabo V. Rotokha, NCS-i ashiba agi, iba asayamung ajanga vote agütsütsü koda tongtibang iba indang tangazükba agütsüogo aser kaketshirtem mulung nung lokti asoshi khuret abentsü tangazükba agütsüogo.

BENDANGLI OSANG : Tapak 7 nungi...

Ukraine-i drone amshia Moscow amak

Ukraine aser Russia narpongla teraksatsüba balala bener arutsüba indang osang ajakbo magütsür. Parnoki nisung aliba ki mesüra civilian infrastructure mesüra civilian tem asüba indang osang dang metetdaksür.

Kasa mapang nung Russian defence ministry-i ashiba agi, parnok indang air defence unit temi Bryansk temeket nung drone 23 tashi raksatsüogo.

Belgorod anasa drone trok, Kaluga anasa asem aser Kursk tesem anasa drone ana raksaja liasü, ta ministry-i ashi.

Arrotsü nung aliba Bryansk tesem drone amshia amkba mapang nisung asüba mesüra kiojen raksaba osang kecha mali, ta iba tesem indang angh Alexander Bogomaz-i Telegram ajanga metetdaksü.

Russia indang RIA state news agency sangdong ka ajanga ashiba agi, Tula tesem nunga drone ana khadangogo.

Maneni Rostov tesem angh Vasily Golubev-i ashiba agi, Ukraine-i yokba missile temi air defence forces temi nokdangogo saka nisung yiruba mesüra asüba osang kecha mali.

BILEMDANGANG
"Tenüngsang agütsütepba ajanga kati ka ajungmesor."